

# Eleccziuns en Spagna

Stabilitad politica relativa

DA GUIU SOBIELA-CAANITZ

■ **Pir ussa pon ins far ina bilantscha da las eleccziuns communalas dals 25 da matg en Spagna. Ins sa duman-dava quant lunsch che la partida da l'emprim minister José María Aznar stuess patir per il fluss nair da la petroliera «Prestige» ed il sustegn spagnol a la conquista da l'Irac malgrà la vigur dal «na a la guerra».** Per questa giada po Aznar esser levgià. Lezza partida merita anc adina ses num: «Partida populara» (pp). Tut en tut han lezs fatgs strusch influenzà tschernas en sasezzas localas. Midadas significativas hai dà be en trais regiuns dal

Nord ed en la citad andalusa da Córdoba.

## Partidas sanestras pitschnas

Cumparegliar duain ins cun las eleccziuns communalas anteriuras, quellas da 1999. Lezza giada ha la pp survegnì 34,4% da las vuschs, ils 25 da matg be pli 33,8%. In pau creschida, da 34,2 a 34,8%, è la part da la Partida socialista (ps), fitg activa tar las grondas manifestaziuns encunter la guerra da l'Irac; las 613 743 vuschs gudagnadas en quatter onns derivan en gronda part da ses ferm «na a la guerra» dals emprims mais da 2003. Be orasum vers nordost, en Catalogna (passa 6 milliuns olmas) ha la ps

pers vuschs cun ina proporziun da 33,2 empè da 37,4%; là han duas partidas sanestras pitschnas, cun ussa 12,7 e 12% da las vuschs, racoltà ils fritgs da lur «na a la guerra», entant che la pp ha survegnì 11,1% enstagl da 10,9. In resultat sumegliant hai dà a Córdoba (passa 300 000 olmas), nua che la ps ha survegnì be pli 12,9% da las vuschs (19,3 dal 1999) encunter 41,9 per la partida sanestra pitschna da la presidenta Rosa Aguilar (be 28,6 dal 1999); ma là ha la pp pers bler (da 46,4 a 39,6%). L'Aragón (passa 1 milliun olmas), limitrof da Catalogna e l'Aquitania (en Frantscha), ha elegì era ses parlament regional; là ha la sanestra gudagnà bler,

tant la ps (da 30,7 a 37,9%) sco ina partida regiunlista giuvna (da 11,1 a 13,8%) che ha fatg campagna encunter «ils dinosaurs politics», entant che la pp ha survegnì be pli 30,8% enstagl da 38,3 (32,7 enstagl da 42,3 tar las tschernas communalas en la chapitala Zaragoza). La Galicia (2,7 milliuns olmas), orasum vers nordvest, unfrenda dal fluss nair, ha «chastià» be levamain la pp che furma la regenza centrala e la regionala; la partida d'Aznar ha tuttina pers 4% da las vuschs galegas. La Spagna ha pia confermà sia stabilitad politica relativa, ma las eleccziuns da 2004 al Congress da deputads pudessan anc manar surpraisas.